

四庫全書

史部

欽定四庫全書

輿地廣記卷十九

宋 歐陽忞 撰

河東路下

望汾州春秋屬晉戰國屬趙秦屬太原郡二漢屬太原
西河二郡魏因之晉屬西河國元魏置西河郡兼置汾
州北齊置南朔州後周改曰介州隋開皇初郡廢大業
初州廢復置西河郡唐武德元年改曰浩州三年改曰

汾州皇朝因之今縣五

望西河縣本漢隰城屬西河郡東漢省之晉復置屬西河國元魏為西河郡及汾州治隋唐皆因之肅宗上元元年改隰城曰西河漢京陵縣地屬太原郡即趙文子與叔向觀於九原之所漢茲氏縣屬太原郡魏黃初二年置西河國有西河恭王司馬子盛碑

望平遙縣本漢平陶縣屬太平郡東漢晉因之元魏以諱改陶為遙隋屬西河郡唐屬汾州

上介休縣二漢屬太原郡晉屬西河國元魏分置平昌
縣後周置介休郡省介休縣入平昌隋開皇初郡廢十
八年改平昌曰介休屬西河郡義寧元年復置介休郡
唐武德元年改為介州正觀元年州廢來屬有綿上山
今謂之介山有介子推祠漢鄆縣屬太原郡東漢晉因
之澤在北是為昭餘祁漢中都縣文帝為代王都此屬
太原郡東漢晉因之後皆入介休

上孝義縣漢中陽縣屬西河郡東漢因之隋曰永安貞

觀元年更名孝義有隱泉山

中靈石縣本漢介休縣地隋開皇十年置屬汾州唐因之有賈胡堡唐高祖討宋金剛次於此地有高壁嶺雀鼠谷汾水關皆險固之處

上澤州春秋屬晉戰國屬韓後屬趙秦屬上黨郡二漢屬上黨河東二郡魏晉因之元魏置達州及高都長平安平三郡北齊置長平高都二郡後周併二郡為高平郡隋開皇初郡廢改州為澤州大業初州廢置長平郡

置澤州天寶元年曰高平郡皇朝因之統縣六

緊晉城縣本高都縣二漢晉屬上黨郡元魏置建州北
齊置長平高都二縣後周併為高平郡隋開皇初郡廢
十八年改縣為丹川大業初置長平郡唐武德元年置
建州三年析丹川縣置晉城六年州廢隸蓋州徙蓋州
來治九年省丹川入晉城貞觀元年州廢隸澤州來治
有天井關在縣南太行山上

上高平縣本注氏縣地二漢屬晉上黨郡後析置平高

縣北齊改曰高平省涇氏入焉隋屬長平郡唐武德元年置蓋州貞觀元年州廢屬澤州秦將白起坑趙降卒四十萬人於長平即此地今有頭顱山

上陽城縣本漢澤縣二漢屬河東郡晉屬平陽郡隋置澤州取濩澤為名後屬長平郡唐武德元年復置澤州八年徙治端氏天寶元年改縣為陽城有禹貢析城山王屋山濩澤水

中端氏縣韓趙魏既分晉徙晉君於端氏即此二漢屬

河東郡晉屬平陽郡元魏置安平郡隋開皇初郡廢屬
澤州唐武德六年徙州來治此貞觀元年徙治晉城
中陵川縣本漢涇氏縣北齊省之隋開皇十六年置陵
川縣屬澤州唐武德元年屬蓋州貞觀元年來屬

中下沁水縣二漢晉皆屬河內郡元魏置廣寧郡北齊
郡廢改縣為永寧隋開皇十八年復為沁水屬澤州唐
武德元年屬蓋州貞觀元年來屬

中憲州自唐以前地理與嵐州同本樓煩監牧以嵐州

刺史兼領貞元十五年別置監牧使龍紀元年節度使李克用表置憲州及樓煩縣皇朝因之咸平五年以樓煩屬嵐州以嵐州之靜樂來屬熙寧三年州廢十年復置統縣一

中靜樂縣漢汾陽縣地屬太原郡後置奇嵐縣隋開皇十八年改曰汾源大業四年又改為靜樂屬樓煩郡唐武德四年置管州六年州廢以靜樂屬嵐州皇朝咸平中來屬熙寧三年屬嵐州十年復來屬有管涔山汾水

所出有隋汾陽宮故天池縣唐龍紀三年置屬憲州咸平省入靜樂

下嵐州春秋屬晉後為胡地有樓煩王居焉其後屬趙秦屬太原郡二漢晉因之後魏末置嵐州隋大業四年置樓煩郡唐武德四年置東會州六年更名嵐州皇朝因之統縣三

中宜芳縣本漢汾陽縣屬太原郡高帝封靳強為侯國積粟所在謂之羊腸倉有羊腸坂石磴縈回若羊腸焉

隋末置嵐城縣屬樓煩郡唐武德四年更名宜芳六年
為嵐州治有古秀容城魏土地記曰秀容胡人徙居之
立秀容護軍治之

中下合河縣北齊置蔚汾縣隋大業四年改曰臨泉屬
樓煩郡唐武德三年改曰臨津六年屬嵐州貞觀元年
又改為合河東有蔚汾關西有合河關

下樓煩縣唐龍紀元年於樓煩監西一里置為憲州治
皇朝咸平中以縣來屬

下石州戰國時趙之離石邑後為秦魏二國之境秦屬
太原郡地漢屬西河郡東漢為郡治焉晉置西河國北
齊置西汾州及懷政郡後周改州為石州郡為離石郡
隋開皇初郡廢大業初州廢復置離石郡唐武德元年
復為石州天寶元年曰昌化郡皇朝因之統縣三

中離石縣本戰國趙邑秦昭王伐趙取離石是也後屬
太原郡漢屬西河郡而東漢徙郡治此晉為西河國治
自漢末匈奴入居內郡魏武帝分其眾為五部在離石

者以左賢王去卑監之去卑之豹豹子淵世據此地謂之左國城晉惠帝時淵起兵於此後趙石勒置永石郡後縣廢焉北齊置昌化縣及懷政郡後周郡縣並改曰離石隋因之唐為石州

中平夷縣後周析離石縣置隋屬離石郡唐屬石州

中方山縣後周置窟胡縣及窟胡郡隋開皇初郡廢後縣改為修化屬離石郡後周又置廬山縣大業初并入修化唐為方山縣武德二年置方州三年州廢來屬按

舊史言方山隋縣隋史石州無方山有修化豈隋末更名而史官失紀歟有方山赤洪水

下遼州春秋屬晉戰國屬韓後屬趙秦二漢屬上黨郡
晉為樂平郡後魏為遼陽郡隋屬遼州大業初州廢屬
太原郡唐武德三年復屬遼州六年州徙來治此八年
曰箕州先天元年改曰儀州天寶元年曰樂平郡中和
三年復曰遼州皇朝因之熙寧七年州廢屬平定軍元
豐八年復置今縣四

下遼山縣本涇氏縣地二漢屬上黨郡晉屬遼陽縣屬樂平郡元魏曰遼陽北齊省之隋開皇十年復置更名遼山十六年屬原州大業初州廢屬太原郡唐武德三年復屬遼州六年州治徙此有遼陽山古箕城春秋晉人敗狄於箕先軫死焉即此

中下榆社縣本涇氏縣地二漢屬上黨郡晉置武鄉縣唐武德元年屬韓州三年以縣及并州之平城置榆州六年州廢來屬

下平城縣

下和順縣本韓之關與邑趙奢破秦軍於關與即此漢
為沾縣屬上黨郡後置梁榆縣晉盧諶征艱賦云訪梁
榆之虛郭乃關與之舊平是也隋開皇十年改曰和順
屬太原縣唐武德三年來屬熙寧七年省為鎮入遼山
元祐元年復置

下豐州自五代以前地理與府州同皇朝嘉祐七年以
府州羅泊川掌地置東南接府州西接麟州不統縣

同下州威勝軍自五代以前地理與潞州同皇朝太平興國二年置威勝軍併沁州入焉今縣四

中銅鞮縣本晉大夫羊舌之邑漢高帝破韓王信於此縣二漢及晉屬上黨郡隋唐屬潞州皇朝為威勝軍有舊潞縣後魏改為陽城開皇十八年改為甲川大業初省入銅鞮

上武鄉縣漢潞縣地晉置武鄉縣屬上黨郡石勒其縣人也有漚麻池勒與李陽爭池相毆即此及僭位置武

鄉郡後魏去武字隋開皇初郡廢屬潞州十六年分置榆社縣大業初省入唐武后復加武字屬潞州皇朝太平興國二年來屬

中下沁源縣本穀遠縣二漢屬上黨郡晉省之元魏置沁源縣及義寧郡隋開皇初廢十六年置沁州大業初初州廢屬上黨郡唐武德元年復置沁州天寶元年曰陽城郡皇朝太平興國六年廢州以沁源來屬

中下綿上縣隋開皇十六年分介休縣之南境置屬汾

州唐武德元年屬沁州皇朝太平興國六年屬大通監
寶元二年來屬晉文公以綿上為介之推田曰以志吾
過且旌善人即此

同下州平定軍春秋屬晉戰國屬趙秦及二漢屬太原
上黨二郡晉置樂平郡元魏為西陽郡後復為樂平隋
開皇初郡廢十六年置遼州大業初州廢屬太原縣唐
武德三年復置遼州治樂平領遼山平城石艾等縣後
州徙治遼山而樂平石艾還屬并州皇朝太平興國二

年置平定軍今縣二

中平定縣本上艾縣漢屬太原郡東漢屬常山國晉屬樂平郡後改曰石艾隋屬太原郡唐武德三年屬遼州六年屬受州八年州廢屬并州天寶年改曰廣陽皇朝太平興國四年改曰平定置平定軍

中樂平縣本沾縣二漢屬上黨郡晉置樂平郡元魏北齊後周皆因之隋開皇初廢郡為樂平縣屬太原郡唐武德三年以縣置遼州六年徙治遼山而樂平屬并州

皇朝太平興國四年來屬

同下州奇嵐軍自五代以前地理與嵐州同皇朝太平興國四年析置奇嵐軍今縣一

下嵐谷縣唐長安三年析宜芳縣置屬嵐州并以奇嵐柵為軍景龍中張仁亶徙其軍於朔方留者號奇嵐守捉隸大同軍皇朝復以縣置軍有奇嵐水奇嵐山

同下州寧化軍自五代以前地理與嵐州同皇朝太平興國四年析嵐州地置寧化縣五年於縣置軍領寧化

一縣熙寧三年縣廢後復置崇寧三年又廢有雪山汾水

同下州火山軍自五代以前地理與嵐州同皇朝太平興國七年以嵐州雄勇鎮置軍治平七年置火山縣四年縣廢有火山黃河

同下州保德軍自五代以前地理與嵐州同皇朝淳化四年析嵐州地置定羌軍景德二年改曰保德不領縣有黃河

同下州晉寧軍自五代以前地理與石州同

中下臨泉縣後周置曰烏突及置烏突郡隋開皇初郡廢縣尋改曰太和屬石州唐武德三年改縣曰臨泉置北和州貞觀三年州廢屬石州有湫水皇朝置軍來屬中定胡縣漢離石縣地後周置及置定胡郡隋開皇初郡廢屬石州有孟門關其地險固

河東路化外州

單于大都護府本戎狄地戰國屬趙秦漢屬雲中郡魏

晉皆屬新興郡隋屬榆林郡唐龍朔三年置雲中都護府麟德元年改為單于大都護府升振武軍節度東北至朔州南至勝州領縣一

中金河縣唐天寶四年置有金河有燕然山東漢竇憲勤銘於此有李陵臺有王昭君墓名曰青冢唐咸通中李國昌為節度使恣橫拒命而子克用盜據雲州侵掠代北為邊患焉

安北大都護府唐龍朔三年立曰瀚海都督府總章二

年更名開元二年治中受降城十年徙治豐勝二州之境十二年徙天德軍領縣二

中陰山縣故北戎之地陰山東西千餘里草木茂盛多禽獸匈奴依阻其中治弓矢出來為寇是其苑囿也戰國屬趙趙武靈王築長城自代並陰山下至高闕為塞秦始皇斥逐匈奴自榆中並河以東屬之陰山以為三十四縣漢初復為匈奴所有武帝出師征伐斥奪此地置陰山縣屬西河郡匈奴失陰山過之未嘗不哭東漢

省入西安陽屬五原郡唐天寶元年置陰山縣

上通濟縣

鎮北大都護府唐立領縣二

上大同縣

上長寧縣

下都督雲州本戎狄地戰國屬趙秦屬鴈門定襄代三
郡二漢晉因之後魏道武徙都平城置司州代尹孝文
遷都洛陽改代尹曰萬年尹隋屬馬邑郡唐武德四年

置北常州七年州廢貞觀十四年置雲州天寶元年曰雲中郡升大同軍節度領縣一

上雲中縣本平城縣地漢晉屬鴈門郡後魏以為代都北齊置大平縣後周改曰雲中隋開皇初改曰雲內屬馬邑郡唐貞觀十四年自朔州北定襄城移雲州於雲內之常安鎮置因改雲內為定襄縣永淳元年為默啜所破州縣俱廢開元二十年復置改定襄曰雲中有故陰館縣漢屬鴈門郡東漢為郡治後魏置平齊郡尋廢

有故高柳城漢屬代郡東漢屬代郡東漢為郡治有叅
合坡韓王信又與胡騎入居叅合柴將軍屠叅合斬信
於此有故桐過城二漢屬定襄郡有故武進城漢屬定
襄郡東漢屬雲中郡有故盛樂縣漢曰成樂屬定襄郡
東漢屬雲中郡後魏昭成徙居盛樂宮即此有白登山
匈奴圍漢高帝於此有單于臺漢武出長城登單于臺
勒兵十八萬騎旌旗徑千餘里威震匈奴即此

望應州唐末置後唐天成元年升彰國軍節度領縣二

望金城縣後唐明宗其縣人也故置彰國軍而以金城為望縣

上混源縣

上新州唐末置後唐同光二年升威勝軍節度領縣四中永興縣

礬石縣

龍門縣

懷安縣

下蔚州本代地在常山之北趙簡子與諸子約曰吾藏寶符於常山上先得者賞諸子馳之常山無所得毋卹還曰已得符矣從常山上臨代代可取也於是簡子以毋卹為賢其後繼立是為襄子襄子北登夏屋請代王使厨人以銅斗擊殺之遂發兵定代地及武靈王置代郡秦及漢晉皆因之後魏置懷荒禦夷二鎮及靈丘郡後周置蔚州隋開皇初郡廢大業初州廢屬鴈門上谷二郡唐武德六年置蔚州天寶元年曰安邊郡至德二

載曰興唐郡統縣三

中下靈丘縣有趙武靈王墓因以為名漢屬代郡東漢省之後魏復置及置靈丘郡後周置蔚州隋屬鴈門郡唐初沒於突厥武德六年置蔚州僑治陽曲七年僑治繁峙八年僑治秀容故北常州城貞觀五年破突厥復故地還治靈丘有涇水發源於高氏山東入河漢志注以為靈丘之號在趙武靈王之前此說非也齊地別有靈丘孟子謂蚺鼃辭靈丘而請士師是也此靈丘趙之

之北境非齊趙兵交之地

中興唐縣本安邊縣唐開元十二年置治橫野軍至德二載更名興唐

下飛狐縣本唐昌縣漢屬代郡東漢省之晉復置隋仁壽初改曰飛狐屬上谷郡唐屬蔚州有飛狐谷飛狐關在代國南四十里漢酈食其說高帝所謂距飛狐之口是也晉劉琨為胡人所攻自代出飛狐口奔於安次即從此道

下朔州本戎狄地戰國屬趙秦漢屬代鴈門二郡靈帝末羌胡大擾定襄靈中五原朔方上郡之民並流徙分散建安二十年魏武帝始集塞下荒地置新興郡晉惠帝改曰晉昌郡後魏置懷朔鎮及朔州北齊置廣安郡隋開皇初郡廢大業初州廢置代郡尋改為馬邑郡唐武德四年復曰朔州統縣二

中善陽縣本劇陽縣漢屬鴈門郡王莽改曰善陽東漢復曰劇陽晉省之北齊置招遠縣及廣安郡隋開皇初

郡廢改縣曰善陽置代郡尋曰馬邑唐置朔州有故桑
乾縣二漢屬代郡後魏置桑乾郡北齊改為廣寧郡後
周廢之有秦馬邑城晉太康地記云秦時建此城城輒
崩不成有一馬周旋馳走反覆父老異之依以築城城
乃不壞遂名馬邑漢武帝使聶壹翁佯為賣馬邑城以
誘匈奴單于信之乃以十萬騎入武周塞覺漢兵謀引
去即此地也二漢及晉屬鴈門郡故武州縣二漢鴈門
郡所謂武周塞是也有紫河發源於此

中禹邑縣唐開元五年析善陽置治大同軍城

下寨州唐末置領縣一

下寨清縣

下儒州唐末置領縣一

下縉山縣

下毅州本武州唐末置後唐長興元年改曰毅州領縣

一

下文德縣

輿地廣記卷十九

欽定四庫全書

輿地廣記卷二十

宋 歐陽忞 撰

淮南東路

大都督府揚州春秋屬吳吳滅屬越越滅屬楚秦屬九江郡漢高帝六年為荊國十一年為吳國景帝曰江都國武帝曰廣陵國東漢為郡魏為重鎮後吳得之西晉屬廣陵郡東晉時以郗鑒都督青兗二州諸軍事鎮此

宋置廣陵郡文帝兼置南充州齊梁因之北齊改曰東
廣州陳復曰南充州後周改為吳州隋開皇九年改為
揚州大業初置江都郡唐武德二年曰南充州七年曰
邳州以刊溝為名左傳所謂吳城邳溝以通江淮是也
九年曰揚州天寶元年曰廣陵郡領淮南節度唐末楊
行密竊據其地後為李昇所取今縣三

緊江都縣漢屬廣陵國東漢晉因之自梁至隋或廢或
置隋為江都郡治唐為揚州有江水祠俗謂之子胥廟

蓋以祭江神而子胥配食耳

緊廣陵縣漢吳王濞所都後為江都廣陵國及郡治焉
魏文帝征吳幸廣陵故城臨江觀兵歎曰天所以限南
北也北齊置廣陵江陽二郡開皇初郡廢十八年改縣曰
邗江大業初改曰江陽為江都郡治後省入江都唐貞
觀十八年復置與江都分治後改曰廣陵唐韓皋號知
音常論廣陵散以為王凌母丘儉諸葛誕皆欲以揚州
興兵正復魏室而不克魏由是散亡此說非也凌等為

都督時揚州治壽春至隋始以廣陵為揚州治凌等起
事與廣陵殊不相涉

望天長縣本千秋縣唐天寶元年析江都六合高郵置
七載更名

望亳州春秋屬陳戰國屬宋秦屬碭郡漢屬沛郡東漢
屬沛國兼為豫州刺史治焉魏置譙郡晉宋因之後魏
亦曰譙郡兼立南兗州後周改州曰亳州隋開皇初郡
廢大業初州廢置譙郡唐初曰譙州貞觀八年更名毫

州天寶元年復曰譙郡皇朝大中祥符七年升集慶軍
節度今縣七

望譙縣春秋陳邑漢屬沛郡魏武帝其邑人也置譙郡
後周曰亳州置小黃縣及陳留郡隋開皇初郡廢大業
二年改小黃曰譙縣唐因之

望城父縣春秋陳邑左傳楚昭王救陳師于城父是也
漢屬沛郡東漢屬汝南郡晉屬譙郡後魏曰浚儀隋開
皇十八年改曰城父屬亳州唐因之南有乾溪楚靈王

敗於此

望蒙城縣本山桑縣漢屬沛郡東漢屬汝山郡晉屬譙
郡後魏置譙州及渦陽縣兼置南譙郡梁改州曰西徐
州東魏改曰譙州隋開皇初郡廢十六年改渦陽縣為
肥水大業初州廢改肥水曰山桑屬譙郡唐屬亳州天
寶元年改為蒙城蒙館鎮本梁置北新安郡東魏改為
蒙郡北齊郡廢置蒙縣後廢為鎮

望鄴縣顏師古云字本作鄴音峽中古以來皆借鄴字

為之讀皆作鄺而莽呼為贊治則此縣亦有贊音二漢屬沛郡晉屬譙郡後廢隋開皇十六年復置屬譙郡唐屬亳州馬頭鎮本建平縣漢屬沛郡東漢省之後魏置馬頭郡北齊廢為鎮

望永城縣本芒敬丘二縣地二漢屬沛郡昭帝更敬丘曰大丘光武更芒曰臨睢後皆省焉隋末置永城縣唐屬亳州芒縣故城在今縣北有芒山與碭山相接漢高帝隱於此大丘縣故城在今縣西北東漢陳寔為此縣

長

望衛真縣本苦縣城東有賴鄉祠老子所生之地漢屬
睢陽國東漢屬陳國晉屬梁國後魏為谷陽縣屬陳留
郡北齊省之隋開皇六年復置屬亳州唐乾封元年改
名真源載初元年曰仙源神龍元年復曰真源皇朝大
中祥符七年改曰衛真

緊鹿邑縣本曰鳴鹿春秋晉邑左傳諸侯侵陳至於鳴
鹿即此東漢置武平縣屬陳國晉屬梁國隋開皇十八

年改為鹿邑屬淮陽郡唐屬亳州戰城鎮本漢鄆縣屬沛郡東漢屬沛國晉省之

上宿州春秋戰國屬宋秦屬泗水郡漢屬沛郡東漢屬晉沛國梁置睢州北齊置睢南郡隋開皇初郡廢三年州廢屬徐泗亳三州唐因之元和四年初泗州之虹徐之符離新置宿州太和三年廢七年復置左徐州南界泗水上今縣五

望符離縣二漢晉屬沛郡北齊置睢南郡唐置宿州漢

竹縣屬沛郡東漢為竹邑及晉皆屬沛國梁置睢州隋開皇三年廢竹邑入符離漢相縣為沛郡治東漢晉因之後廢故城在今縣西北項羽破漢軍於靈壁東睢水為之不流即此縣界

望蘄縣本秦縣二世元年七月陳勝率戍卒起蘄即此二漢屬沛郡西有會甄鄉高帝破黥布於此晉屬譙郡梁置蘄郡北齊置仁州隋開皇初郡廢大業初州廢屬鼓城郡唐屬宿州漢龍亢縣屬沛郡東漢屬廢國晉屬

譙郡北齊置龍亢郡隋開皇初郡廢入蘄

緊臨渙縣本鉅縣漢屬沛郡東漢屬沛國晉屬譙郡後
魏改為臨渙屬臨渙郡北齊郡廢隋屬譙郡唐武德四
年置北譙州貞觀十七年州廢屬亳州天祐四年來屬
皇朝大中祥符七年復屬亳州天禧元年來屬有稽山

中虹縣本埶夏丘二縣地漢皆屬沛郡東漢埶屬沛郡
夏丘屬下邳國晉因之後皆廢焉北齊復置夏丘縣及
夏丘郡兼置潼州後周改為宋州改縣為晉陵隋開皇

初郡廢十八年州廢縣復曰夏丘屬泗州唐武德四年置仁州又析夏丘置虹縣六年省夏丘貞觀八年州廢以虹屬泗州元和四年來屬

靈璧縣

緊楚州春秋屬吳戰國屬楚秦屬九江郡漢屬臨淮郡東漢屬廣陵郡下邳國晉屬臨淮廣陵二郡東晉為重鎮元帝使劉隗守淮陰是也安帝置山陽郡宋齊因之後魏置淮陰郡東魏改為淮州隋開皇初山陽郡廢十

二年置楚州大業初州廢屬江都郡唐武德四年曰東楚州八年更名天寶元年曰淮陰郡今縣四

望山陽縣本漢射陽縣屬臨淮郡東漢建武十五年封子荆為山陽公治此十七年為三國後屬廣陵郡晉因之義熙七年置山陽郡改射陽縣為山陽縣宋因之隋置楚州大業初州廢屬江都郡隋末臧君相竊據之號東楚州唐武德四年君相降因之八年曰楚州

緊寶應縣本平安縣二漢屬廣陵國晉省之後置安宜

縣隋屬江都郡唐武德四年以縣置倉州七年州廢來屬上元三年以獲定國寶十三枚因改元寶應兼改縣魏鄧艾築石鼉城在今縣西八十里以營田

上鹽城縣本漢鹽漬縣屬臨淮郡東漢晉屬廣陵郡後安帝改曰鹽城縣宋因之北齊置射陽郡陳改曰鹽城郡隋開皇初郡廢屬揚州隋末盜章徹據其地置射州及射陽安樂新安三縣唐武德四年來歸因之七年州廢省三縣而置鹽城來屬

中淮陰縣漢屬臨淮郡韓信其邑人也今城東有漂母冢東漢屬下邳國晉為廣陵郡治後魏置淮陰郡東魏改為淮州北齊置懷恩縣後周改曰壽張隋開皇初改曰淮陰大業初州廢省縣入山陽唐乾封二年復置屬楚州

上海州春秋戰國為魯東境後屬楚秦屬薛郡後分為郟郡漢改郟為東海郡東漢晉宋因之宋僑立青冀二州梁置南北二青州後入元魏東魏置海州隋開皇初

郡廢大業初州廢為東海郡唐武德四年復曰海州天寶元年復曰東海郡今縣四

緊胸山縣本胸縣二漢晉屬東海郡後魏置琅邪郡後周改縣曰胸山并胸山郡隋開皇初郡廢大業初置東海郡唐為海州秦始皇立石於胸縣海上以為秦之東門即此

中懷仁縣本祝其利城二縣地二漢晉屬東海郡後皆廢梁置南北二青州東魏州廢置義塘郡及懷仁縣隋

開皇初郡廢屬海州唐武德四年置利城新樂二縣六年改新樂曰祝其八年省入懷仁有夾山春秋公會齊侯於夾谷傳謂之祝其是也有羽山舜殛鯀於此

中沭陽縣本原丘縣地二漢晉屬東海郡後廢梁置潼陽郡東魏改曰沭陽郡及置懷文縣後周改縣曰沭陽隋開皇初郡廢屬海州唐武德四年置原丘縣八年省為鎮入沭陽

中東海縣本贛榆縣地漢屬琅邪郡東漢晉屬東海郡

後廢後魏置東海郡及廣饒縣隋開皇初郡廢仁壽元年改廣饒曰東海屬海州唐武德四年置環州并置青山石城贛榆三縣八年州廢省三縣以東海來屬縣治鬱洲四面環海齊王田橫入海所保鬱洲也有郁州山一名蒼梧山俗傳此山在蒼梧徙來上有南方秣稷

上泰州春秋屬吳秦屬九江郡漢屬臨淮郡東漢晉屬廣陵郡安帝分置海陵郡宋齊因之隋開皇初郡廢屬江都郡唐武德三年置吳州七年州廢屬揚州五代吳

楊氏置海陵制置院南唐李氏升為泰州皇朝因之後
曰海陵郡今縣四

望海陵縣漢屬臨淮郡有吳太倉枚乘傳不如海陵之
倉是也東漢省之晉復置屬廣陵郡安帝置海陵郡唐
武德三年改縣曰吳陵置吳州七年州廢復故名吳置
海陵制置院南唐為泰州

緊興化縣南唐置

中泰興縣南唐置

中下如皋縣晉安帝置寧海如皋二縣隋開皇初置如皋入寧海屬江都郡南唐復置

上泗州春秋屬徐戰國屬吳秦屬泗水郡漢屬臨淮郡東漢屬下邳國兼置徐州晉屬臨淮郡元魏置盱眙郡梁置高平郡又置濟陰郡隋開皇初郡皆廢屬揚泗濠三州唐屬楚泗濠三州今縣三

緊盱眙縣漢為臨淮都尉治東漢屬下邳國晉為臨淮郡治明帝兗州刺史劉遐自彭城退屯泗口即此

安帝時置角城鎮在淮泗之會後魏置盱眙郡陳置
北譙州尋省隋開皇初郡廢屬揚州唐武德四年置
西楚州八年廢屬楚州光宅初改曰建中後復故名
建中二年屬泗州後復屬楚州皇朝乾德元年又屬
泗州州徙治此有都梁山龜山禹治水以鐵鎖鑠淮
渦水神無支奇於龜山之足唐永泰中刺史李湯以
大牛五十引鎖出之鎖末有一青猿高五丈許復拽
牛沒水

上臨淮縣本漢下相僮二縣地屬臨淮郡東漢屬下邳國晉以下屬臨淮郡而省僮縣後下相亦廢焉唐長安二年析徐城南境置臨淮縣屬泗州開元二十五年州自宿預徙來治此漢下相縣故城在今縣西北僮縣故城在西南徐城鎮本徐國嬴姓有徐君墓季札挂劍之所漢屬臨淮郡東漢屬下邳國晉屬臨淮郡梁置高平郡東魏置高平縣隋開皇初郡廢十八年改縣曰徐城屬泗州唐因之皇朝建隆二年省為鎮入臨淮

上招信縣本淮陵縣地漢屬臨淮郡東漢屬下邳國晉屬臨淮郡宋曰睢陵置齊陰郡後州改縣曰招義隋開皇初郡廢大業初改縣曰北明屬鍾離郡隋末縣民馬簿盜據號化州唐因之武德三年改縣曰招義貞觀八年州廢屬濠州皇朝乾德元年來屬太平興國元年更名

上滁州春秋屬吳戰國屬楚秦及二漢屬九江郡晉屬淮南郡宋置新昌郡齊置南譙州北齊改郡為臨滁後

周改曰北譙隋開皇初郡皆廢改南譙州為滁州大業
初州廢屬江都郡唐武德二年復置天寶元年曰永州
郡今縣三

望清流縣本漢全椒縣地後魏置頓丘縣及新昌郡南
譙州故城在今縣西南八十里北齊徙來治此隋開皇
初改為滁州廢郡為新昌縣十八年改曰清流大業初
州廢屬江都郡唐置滁州周世宗征南唐李景使皇甫
暉屯清流闕為周師所敗暉被擒於此

望來安縣本永陽縣唐景龍三年析清流縣置屬滁州
後改為來安

緊全椒縣二漢屬九江郡晉屬淮南國後廢梁置北譙
縣及北譙郡北齊改縣曰臨滁後周復曰北譙隋開皇
初郡廢改縣曰滁水大業初改為全椒屬江都郡唐屬
滁州二漢阜陵縣屬九江郡明帝時淪為麻胡晉屬淮
南郡後廢焉故城在今縣南

上真州自五代以前地理與揚州同南唐以永貞縣地

置迎鑾鎮皇朝乾德二年置建安軍大中祥符六年以聖像成功升為真州統縣二

中揚子縣唐永淳元年析江都縣置屬揚州後改為永貞縣皇朝於縣之迎鑾鎮置軍雍熙二年以永貞為屬後復改為揚子屬真州

望六合縣本楚之棠邑伍尚為棠邑大夫是也漢屬臨淮郡東漢屬廣陵郡晉元康七年置棠邑郡安帝時改置秦郡後別置尉氏縣北齊兼置秦州後周改州曰方

州改郡曰六合隋開皇初郡廢四年改尉氏為六合縣
省堂邑入焉大業初州廢屬江都郡唐屬揚州皇朝至
道二年來屬有瓜步山後魏太武南伐起行宮於瓜步
山諸軍同日皆臨江即此

中通州自唐以前地理與泰州同南唐李氏置靜海制
置院周顯德中世宗克淮南升為軍後以為通州皇朝
天聖元年改曰崇州明道二年復故今縣二

望靜海縣本海陵之東境周顯德中置

望海門縣本海陵之東境周顯德中置

同下州高郵軍歷代地理與揚州同皇朝開寶四年置
高郵軍熙寧五年廢元祐元年復置今縣一

望高郵縣漢屬廣陵國東漢屬廣陵郡吳省之晉武帝
太康元年復立屬臨淮郡宋屬廣陵郡梁析置竹塘三
歸二縣及置廣業郡尋以有嘉禾改為神農郡隋開皇
初郡廢又省竹塘三歸臨潭三縣入焉屬江都郡唐屬
揚州皇朝置軍有神居山

政定四庫全書



輿地廣記

輿地廣記卷二十

欽定四庫全書

輿地廣記卷二十一

宋 歐陽忞 撰

淮南西路

緊壽州春秋戰國屬楚漢屬九江沛二郡東漢屬九江郡兼置揚州魏晉宋齊梁屬淮南郡齊兼置豫州後魏曰揚州梁曰南豫州東魏曰揚州陳曰豫州後周曰揚州隋屬汝陰淮南二郡唐屬潁壽二州後唐天成三年

升為忠正軍節度周顯德中自壽春徙治潁州之下蔡
皇朝因之今縣五

緊下蔡縣故州來國為楚所滅左傳楚靈王狩于州來
次于潁尾地蓋在淮潁之會後吳取之以封季札至夫
差時蔡成公自新蔡徙此謂之下蔡秦相李斯其縣人
也漢屬沛郡東漢屬九江郡晉屬淮南郡梁置汴郡北
齊郡廢隋屬汝陰郡唐屬潁州周世宗伐南唐克壽春
乃自壽春徙州治此有硤石山潁水淮水梁大同中於

硤石山築城距東魏卽縣城也

望安豐縣漢陽泉安風蓼三縣地屬六安國東漢屬廬江郡魏置安豐郡晉後魏梁陳皆因之隋開皇初郡廢屬壽州唐因之有芍陂楚相孫叔敖所造徑百里灌田萬頃魏太尉王淩與吳將張休文戰於芍陂卽此有六國故城在縣南又有蓼國皆皋陶之後偃姓後項羽封黥布為九江王都六漢高帝元年別為衡山國五年屬淮南國文帝十六年復為衡山武帝元狩二年別為六

安國治六而以蓼為屬東漢國廢以六蓼屬廬江郡晉省蓼而六屬廬江後省六入安豐陂中有大冢即臯陶冢楚人謂之公琴

望霍丘縣漢安豐松滋二縣地晉屬安豐郡後立霍丘成隋開皇十九年置霍丘縣屬壽州唐武德四年以松滋霍丘二縣置蓼州七年州廢來屬縣北有安豐津魏母丘儉既敗藏水草中安豐津都尉部民張屬斬之即此松滋漢屬廬江郡晉屬安豐郡唐省

緊壽春縣戰國時楚考烈王自陳徙都壽春命曰郢秦
滅楚置九江郡漢高帝封子長為淮南王長子安謀反
誅地入又為九江郡東漢因之為揚州刺史治魏王凌
母丘儉諸葛誕皆以揚州相繼起兵欲興魏室並為司
馬氏所誅晉為淮南郡兼置揚州避鄭皇后諱改壽春
曰壽陽後復曰壽春元魏因之隋改揚州曰壽州唐因
之周世宗伐南唐劉仁贍固守不降世宗以其難克遂
徙州治下蔡而復其軍曰忠正軍曰吾以旌仁贍之節

也有八公山上有淮南王安廟圖安及八公像後晉謝
玄北禦苻堅祈八公山及陳於淝水堅望見山上草木
皆為旌旗之狀秦師遂敗

中六安縣本漢潛安豐二縣地晉永和中謝尚鎮馬頭
城在今縣北梁置霍州及岳安郡及岳安縣北齊州廢隋
開皇初郡廢改縣為霍山屬廬州唐武德四年以霍山
應城潛城三縣置霍州貞觀元年州廢省應城潛城以
霍山來屬神功元年曰武昌神龍元年復改名開元二

十七年改為盛唐皇朝開寶四年改為六安霍山鎮唐
天寶初析盛唐別置霍山縣開寶元年省為鎮入盛唐
有霍山有禹貢大別山潛本楚邑漢屬廬江郡東漢晉
因之後省焉唐武德五年復置潛縣貞觀中省入霍山
有汶水潛水

上廬州春秋屬舒戰國屬楚秦屬九江郡漢屬廬江九
江二郡東漢因之曹公用劉馥為揚州刺史以合肥空
城建立州治魏遂以為重鎮晉屬淮南廬江二郡梁置

南豫州尋改曰合州隋開皇初改曰廬州大業初州廢
唐長興二年升為昭順軍節度周顯德五年改為保信
軍皇朝因之今縣三

上合肥縣應劭曰夏水自城父東南至此與肥合故曰
合肥二漢屬九江郡魏以張遼守之吳孫權率衆十萬
攻圍不克明帝時滿寵都督揚州諸軍鎮北於西北三
十里築新城孫權欲圍之不敢下船後諸葛恪圍新城
亦失利而退晉屬淮南郡後廢焉梁置汝陰縣及汝陰

郡隋開皇初郡廢為合肥置廬州唐因之有金牛山淝水淮水

中慎縣本浚道縣二漢屬九江郡故城在今縣南晉屬淮南郡後改為慎縣東魏置平梁郡陳曰梁郡隋開皇初郡廢屬廬州唐因之

下舒城縣古舒國偃姓後為楚所滅二漢舒縣為廬江郡治後廢焉唐開元二十三年析合肥廬江置舒城縣屬廬州有龍舒山龍舒水

望蘄州春秋戰國屬楚秦屬九江郡二漢屬江夏郡吳
置蘄春郡晉廢屬弋陽郡北齊置雍州及齊昌郡後周
改州曰蘄州隋開皇初郡廢大業初州廢置蘄春郡唐
武德四年曰蘄州天寶元年曰蘄春郡皇朝因之今縣
五

望蘄春縣二漢屬江夏郡吳置蘄春郡晉屬弋陽郡改
縣曰蘄陽梁改曰蘄水北齊改曰齊昌郡隋開皇初郡
廢置蘄州十八年縣復曰蘄春唐因之

望蘄水縣漢蘄春縣地宋置浣水縣及永安郡隋開皇
初郡廢屬蘄州唐武德四年改縣曰蘭溪天寶元年改
曰蘄水

羅田縣

望廣濟縣唐武德四年析蘄春置永寧縣天寶元年改
名廣濟有積布山黃石山

望黃梅縣漢蘄春縣地晉元帝置新蔡郡及永興縣後
郡廢隋開皇初改縣為新蔡十八年又改為黃梅屬蘄

州有黃梅山

上和州春秋屬吳戰國屬楚秦漢屬九江郡漢末揚州
刺史自壽春徙治此吳為重鎮晉屬淮南郡惠帝永興
元年分置歷陽郡宋兼置南豫州齊梁皆因之北齊置
和州隋開皇初郡廢大業初州廢復置歷陽郡唐武德
三年改為和州天寶元年曰歷陽郡皇朝因之今縣三
緊歷陽縣秦漢屬九江郡漢末為揚州治晉置歷陽郡
宋置南豫州北齊置和州隋唐因之有歷湖

中舍山縣唐武德四年析歷陽置八年省長安四年復置更名武壽神龍元年復故名有濡湏水吳孫權築濡須塢以拒曹公漢建安二十年公自圍之不克後黃武二年魏軍又攻之不拔

中烏江縣本秦東城縣之烏江亭項羽欲渡烏江即此二漢屬九江郡晉置烏江縣屬淮南郡魏置江都郡北齊改為齊江郡陳改為臨江郡後漢改為同江郡隋開皇初郡廢屬和州

上舒州春秋為皖國及羣舒地戰國屬楚秦屬九江郡二漢屬
廬江郡吳孫權克皖城遂為重鎮晉亦屬廬江郡安帝置晉熙
郡宋齊因之梁兼置豫州後改曰晉州北齊改曰二州陳又改
曰晉州隋開皇初郡廢置熙州大業初州廢置同安郡唐武德
四年改為舒州天寶元年復為同安郡皇朝因之今縣五

上懷寧縣故皖國二漢為縣屬廬江郡漢末吳克皖城
赤烏四年諸葛恪死之晉亦屬廬江郡後改皖縣為懷
寧置晉熙郡隋郡廢置熙州復置同安郡東改為舒州

有潛山一名天柱山漢武帝嘗登此

上桐城縣本漢樅陽縣屬廬江郡武帝自尋陽浮江薄樅陽而出是也東漢省之梁復置及置樅陽郡隋開皇初郡廢屬熙州十八年改縣曰同安唐屬舒州至德二載更名桐城有漢朱邑祠有盛唐山樅陽水

上宿松縣本漢皖縣地梁置高塘郡隋開皇初郡廢置高塘縣屬熙州十八年改縣曰宿松唐武德四年置嚴州八年州廢來屬有長葛山雷水

上望江縣本漢皖縣地晉置新治縣陳置大雷郡隋開
皇初郡廢十一年改縣曰義鄉十八年又曰望江屬熙
州唐武德四年置高州尋改曰智州七年州廢屬嚴州
八年州廢來屬

上太湖縣本漢皖縣地宋置太湖縣隋開皇初改曰晉
熙後復故名屬熙州唐屬舒州

上濠州本鍾離子國春秋時楚滅之以為縣吳又取之
戰國復屬楚秦及二漢屬九江郡晉屬淮南郡東晉置

鍾離郡宋齊梁因之齊兼置北徐州北齊改曰西楚州
隋開皇初郡廢置濠州大業初州廢置鍾離郡字初作
豪唐元和三年改從濠天寶元年復曰鍾離郡皇朝因
之今縣二

望鍾離縣故鍾離三國嬴姓後為楚邊邑楚平王時吳
之邊邑卑梁處女與鍾離小童爭桑兩家交怒相攻滅
兩邑長又怒而起兵相攻遂滅卑梁吳王聞之又怒使
公子光伐楚拔鍾離而還東晉置鍾離郡隋置濠州唐

因之又後魏置當塗縣及馬頭郡北齊改為馬頭縣置
荊山郡隋開皇初郡廢改縣曰塗山屬濠州唐武德七
年省入鍾離有塗山禹之所娶也有濠水莊子與惠子
觀魚之所梁武帝堰淮水於鍾離以灌壽陽即此

望定遠縣本漢東城縣屬九江郡項羽兵敗東城即此
地東漢因之晉屬淮南郡梁改東城曰定遠置臨濠郡
北齊改郡曰廣安隋開皇初郡廢屬濠州唐因之晉曰
西曲陽屬淮南郡北齊省入定遠

上光州春秋為黃弦二國皆為楚所滅戰國屬楚秦屬
九江郡二漢屬汝南江夏郡至魏分置弋陽郡晉宋齊
梁因之兼置光州後魏亦為弋陽郡北齊置南郢州後
周置淮南郡隋開皇初州郡俱廢大業初復置弋陽郡
唐曰光州天寶元年曰弋陽郡皇朝因之今縣四

上定城縣故黃國也楚人滅之二漢為弋陽縣屬汝南
郡故城在今縣西魏置弋陽郡北齊置南郢州後廢為
南北二弋陽縣又省北弋陽入南弋陽改為定城縣後

周又置淮南郡隋初州郡俱廢後屬弋陽郡唐武德三年置弦州貞觀元年州廢屬光州太極元年州自光山徙來治此有黃水

望固始縣本濳丘楚孫叔敖子所封之邑秦之滅楚蒙恬攻濳即此漢為濳縣屬汝南郡光武更名固始晉屬汝陰郡梁置蓼縣北齊復故名置北建州後周改為澮州隋開皇初州廢後屬弋陽郡唐屬弋州商城镇本蔣國周公之後楚滅之以為期思縣漢屬汝南郡東漢因

之晉屬弋陽郡後廢宋置包信縣梁置義城郡及建州
隋開皇初並廢改包信為殷城屬弋陽郡唐武德元年
置義州貞觀元年州廢來屬皇朝建隆元年改曰商城
後省為鎮入固始

中下光山縣故弦國楚人滅之漢為西陽縣屬江夏郡
晉為弋陽郡治梁置光州及光城郡隋開皇初郡廢置
光山縣大業初置弋陽郡唐為光州太極元年州徙治
定城

中下仙居縣本二漢軹縣地屬江夏郡故城今在縣北
四十里晉屬弋陽郡宋分軹縣置樂安縣梁置宋安郡
隋開皇三年郡廢後屬弋陽郡唐屬光州有僕僕先生
居縣黃土山常餌杏丹乘雲往來刺史李休光以為妖
叱左右執之龍虎見乎側先生乘之而去天寶元年乃
詔改樂安縣為仙居

下黃州春秋戰國屬楚秦屬南郡二漢屬江夏郡晉初
屬弋陽郡後屬西陽郡宋因之齊分置齊安郡北齊兼置衡州

後周因之隋開皇初郡廢改衡州曰黃州大業初州廢
置永安郡唐武德三年復為黃州天寶元年復曰齊安
郡皇朝因之今縣三

望黃岡縣本漢西陵縣地屬江夏郡晉屬弋陽郡後屬
西陽國北齊置南安縣及齊安郡隋開皇初郡廢改縣
曰黃岡置黃州大業初置永安郡唐復曰黃州邾縣故
城在今縣東南一百二十里楚宣王滅邾徙之於此故
曰邾項羽封吳芮為衡山王都此漢屬江夏郡東漢因

之晉屬弋陽郡後廢東晉毛寶守邾城為石季龍所敗
有卒投江水遇白龜救之

上黃陂縣本漢西陵縣地北齊置南司州後周置黃陂
縣改南司州曰黃州隋開皇初移州治黃岡縣唐武德
三年置南司州七年州廢來屬

中麻城縣本漢西陵縣地梁置信安縣陳置定州後周
改曰亭州隋開皇初郡廢十八年改縣曰麻城屬黃州
唐武德三年置亭州八年州廢來屬

同下州無為軍自五代以前地理與廬州同皇朝太平興國三年以巢縣之無為鎮置無為軍今縣三

望無為縣漢襄安縣屬廬江郡東漢晉因之梁改曰蘄縣隋開皇初復改為襄安屬廬江郡後併入巢縣置無為鎮皇朝太平興國三年以鎮置無為軍熙寧三年析巢廬江二縣置無為縣

望巢縣古曰南巢成湯放桀於此周初巢伯來朝春秋為羣舒邑叛楚故楚人圍巢二漢為居巢縣屬廬江郡

晉因之隋曰襄安縣唐武德三年置巢州七年州廢改襄安為巢縣屬廬州皇朝太平興國三年來屬有巢湖在縣東南

望廬江縣本漢龍舒縣地屬廬江郡東漢晉因之齊改曰廬江縣置廬江郡梁置湖州北齊州廢隋開皇初郡廢屬廬州唐因之皇朝太平興國三年來屬

輿地廣記卷二十一

欽定四庫全書

輿地廣記卷二十二

宋 歐陽忞 撰

兩浙路上

大都督府杭州春秋屬越戰國屬楚秦屬會稽郡漢因之東漢順帝以後屬吳郡晉屬吳興吳二郡宋齊梁因之陳置錢塘郡隋開皇中郡廢置杭州大業初州廢置餘杭郡唐武德四年置杭州天寶元年曰餘杭郡升鎮

海軍節度五代為吳越王錢氏所有皇朝太平興國四年來歸淳化五年改曰寧海軍今縣九

望錢塘縣五代時晉改縣為錢江後別置錢塘縣與錢江分治州郭下有靈隱山昔楚僧云自天竺鷲山飛來望仁和縣本錢塘縣初郡功曹華信議立此塘以防海水始開幕有能致一斛土石者即與錢一千旬月之間來者雲集塘未成譎不復取皆棄土石而去塘遂成故曰錢塘漢屬會稽郡東漢省之晉復置屬吳郡陳置錢

塘郡隋平陳郡廢自餘杭徙州治此後曰餘杭郡唐復
曰杭州晉天福中避高祖名改錢塘曰錢江皇朝太平
興國四年改曰仁和有臨平湖傳言此湖塞天下亂此
湖開天下平吳孫皓天璽元年吳郡言臨平湖自漢末
穢塞今更開通斯晉氏平吳一天下之符也

望餘杭縣秦始皇南游至錢塘臨浙江水波惡乃西百
二十里從狹中渡因置餘杭縣漢屬吳稽郡東漢晉屬
吳郡隋置杭州後州徙治錢塘屬杭州有由拳山

望臨安縣本漢餘杭縣地吳孫權分置臨水縣晉武改
曰臨安屬吳郡後廢唐武德七年復置臨水縣屬潛州
八年省入於潛垂拱四年析餘杭於潛以故臨水城復
置臨安縣屬杭州吳越王錢鏐其縣人也鏐既貴以素
所居營為安國衣錦軍鏐歸宴故老山林皆覆以錦梁
改臨安縣曰安國縣以尊之皇朝太平興國三年復曰
臨安

緊富陽縣本富春縣漢屬會稽郡東漢屬吳郡吳王孫

權其縣人也置東安郡晉皇后名春孝武改曰富陽屬吳郡隋屬餘杭郡唐屬杭州

緊於潛縣二漢屬丹陽郡晉屬吳興郡隋屬餘杭郡唐屬杭州北有天目山

上新城縣本富春縣地晉咸和中置新城縣隋平陳省入錢塘後復置唐武德七年省入富陽永淳元年復置屬杭州梁改曰新登皇朝太平興國四年復改曰新城有桐溪

卷二十二
上鹽官縣本漢海鹽縣地吳王濞煮海為鹽蓋在此有鹽官吳因置鹽官縣晉屬吳郡隋屬餘杭郡唐屬杭州

中昌化縣本於潛縣地唐垂拱二年析置紫溪縣萬歲通天元年曰武隆縣皆屬杭州神龍元年更武隆為唐山縣大歷二年皆省長慶初復置唐山梁改曰金昌唐同光初年復故名晉改為橫山皇朝太平興國四年改曰昌化有百丈山紫溪水所出東南流逕新城謂之桐溪又逕桐廬入浙江

大都督越州春秋為越國之都周顯王時越王無彊西
伐楚楚威王興兵大敗之盡取故吳地至浙江而越以
此散服朝於楚秦屬會稽郡漢因之東漢置會稽郡乃
自吳縣徙治山陰晉宋齊梁陳皆因之宋兼置東陽州
尋廢梁復置東揚州隋平陳郡廢改州曰吳州大業初
置越州尋廢置會稽郡唐復為越州天寶元年曰會稽
郡升為鎮東軍皇朝因之統縣八

望會稽縣本於越地禹會諸侯江南計功而崩因葬焉

命曰會稽會稽者會計也其後帝少康封庶子杼於會稽以奉守禹祀即越王允常之先也秦置山陰縣屬會稽郡漢因之東漢順帝以後為郡治晉因之後分置會稽縣隋為吳州越州及會稽郡治唐因之南有會稽山秦始皇於此刻石紀功有禹冢禹穴有秦望山在州城正南為衆峯之傑始皇登之以望東海山南有嵯峴峴有大城越之先君無餘舊都於此有鏡湖若耶溪雷門望陰山縣秦漢以來故縣隋平陳省入會稽縣唐垂拱

二年復置在州郭下與會稽分治有鑑湖東漢永和五年太守馬臻所創開周回三百餘里溉田九千餘頃創湖之始多浸冢墓有千餘人怨訐臻因被刑於市及遣使覆按總不見人籍乃知死者所訐也有龜山一名怪山一名自來山本自琅邪東武飛來於此其形似龜故名有蘭溪溪口有亭曰蘭亭晉太守王羲之作曲水序於此

望剡縣漢屬會稽郡東漢晉隋皆因之唐武德四年平李子通置嵯州六年州廢來屬有天姥山

望諸暨縣本曰句無越王允常之故邑國語所謂南至句無是也漢為諸暨縣屬會稽郡東漢晉隋皆因之唐屬越州

望餘姚縣二漢晉皆屬會稽郡隋省入句章縣有句餘山在餘姚南句章北故二縣因以為名唐武德四年復置及置姚州七年廢屬越州

緊蕭山縣本餘暨縣二漢屬會稽郡漢末童謡曰天子常興東南三餘之間故孫權改曰永興縣晉因之隋省

入會稽縣唐儀鳳二年復置屬越州天寶元年改曰蕭山潘水所出水經以為疑是浦陽江之別名自外無水以應之越人西施出於此縣

緊新昌縣本剡縣地五代時置新昌縣屬越州有沃州水

望平江府周初封太伯為吳國春秋末為越所併戰國屬楚秦置會稽郡漢因之東漢順帝置吳郡晉宋齊梁陳皆因之陳兼置吳州隋平陳郡廢改州曰蘇州因姑

蘇山為名大業初州廢復置吳郡唐武德四年曰蘇州
天寶元年曰吳郡南唐升為中吳軍節度皇朝太平興
國三年改曰平江軍政和三年升為平江府今縣五

望吳縣本曰句吳太伯避公季奔荊蠻荊蠻歸之號曰
句吳武王克商因封之至夫差為越所滅後越破更屬
楚秦置會稽郡項梁初起吳中使項籍斬會稽守殷通
即此地漢高帝以封吳王濞後國除復為會稽郡東漢
順帝分置吳郡隋曰蘇州唐因之有姑蘇山虎丘山即

吳王闔廬墓也太湖中有苞山亦曰夫椒山左傳吳伐越敗之夫椒是也山有洞室入地潛行北通瑯邪東武俗謂之洞庭

望長洲縣吳有長洲苑在東漢枚乘諫吳王不如長洲之苑即此唐萬歲通天元年析吳置長洲縣在州郭與吳分治

望崑山縣本漢婁縣地屬會稽郡東漢晉屬吳郡陸機陸雲生於此故名其山曰崑山梁置崑山縣隋平陳省

之開皇十八年復置屬吳郡唐屬蘇州

望常熟縣本漢吳縣地晉分置海虞縣屬吳郡梁分置南沙常熟二縣隋平陳徙常熟於南沙而省海虞入焉屬蘇州唐因之有常熟山

緊吳江縣朱梁開平三年吳越錢鏐奏於松江置吳江上承太湖更逕笠澤國語曰越伐吳吳禦之笠澤是也

望潤州春秋屬吳戰國屬越後屬楚秦屬會稽鄣二郡漢高帝以封荊王劉賈後屬會稽郡東漢屬吳郡吳王

孫權初鎮丹徒謂之京城晉平吳置毗陵郡宋置南東海郡及南徐州梁改郡曰南蘭陵郡陳曰南東海郡自宋至陳常以京口為重鎮隋平陳郡廢開皇十五年置潤州太業初州廢屬江都郡唐武德三年復置潤州天寶元年改為丹陽郡後升鎮海軍節度皇朝改鎮江軍今縣三

緊丹徒縣春秋時謂之朱方齊慶封奔吳子之朱方是也秦時望雲者言其地有天子氣乃使赭衣徒三千人

鑿長坑以敗其勢故曰丹徒漢屬會稽郡東漢屬吳郡
孫權鎮此曰京城晉置毗陵郡宋置南東海郡及南徐
州隋開皇九年置延陵縣省丹徒入焉置潤州以潤浦
為名唐因之武德三年以故延陵縣地復置丹徒縣有
北固山金山

緊丹陽縣古雲陽秦始皇改為曲阿漢屬會稽郡東漢
屬吳郡晉屬毗陵郡隋屬江都郡唐武德三年置雲州
五年曰簡州八年州廢來屬天寶元年改為丹陽延陵

鎮本曲阿縣地唐武德三年以延陵縣地置丹徒乃別
置延陵縣於今所屬茅州七年州廢屬蔣州九年來屬
皇朝熙寧五年省入丹陽

緊金壇縣本曲阿縣地隋末盜起土人保聚因為金山
縣唐屬蔣州武德八年省入延陵垂拱四年復置來屬
更名金壇有茅山

上湖州春秋屬吳吳滅屬越戰國屬楚秦屬會稽鄣二
郡漢屬會稽丹陽二郡東漢屬吳郡吳孫皓分置吳興

郡晉宋齊梁陳因之梁兼置震州隋開皇九年平陳郡廢仁壽中置湖州大業初州廢屬餘杭吳二郡唐武德四年復置湖州天寶元年復曰吳興郡周升為宣德軍節度皇朝景祐元年改昭慶軍今縣六

望烏程縣漢屬會稽郡東漢屬吳郡吳置吳興郡梁置震州隋置湖州唐因之有太湖禹貢震澤也周官謂之具區有苕溪雪溪入焉有卞山衡山左傳吳伐楚至於衡山即此

望歸安縣本烏程縣地皇朝太平興國七年析置歸安縣於郭下與烏程分治

望安吉縣本漢故鄣縣地吳興記曰光和末張角亂此鄉守險助國漢嘉之中平二年分故鄣之南鄉置安吉縣屬丹陽郡晉屬吳興郡梁陳屬陳留郡隋平陳郡廢省安吉入綏安義寧二年沈法興復置唐武德四年賊平因之屬姚州七年省入長城麟德元年復置屬湖州望長興縣本烏程故鄣二縣地吳王闔閭使弟夫概居

此築城狹而長晉武帝因置長城縣屬吳興郡隋平陳
省之仁壽中復置屬吳郡唐武德四年更置綏州因故
綏安縣為名又改曰雉州七年州廢來屬梁避廟諱改
曰長興秦鄣郡故城在縣西南八十里二漢為故鄣縣
屬丹陽郡晉屬吳興郡梁陳屬陳留郡隋省入綏安俗
號為府頭

緊德清縣本武康縣地唐天授元年分置武原縣景雲
二年改為臨溪天寶元年改為德清

上武康縣本防風氏之國漢為烏程縣之餘不鄉漢童
謠言天子當興東南三餘之間吳乃分餘不鄉置永安
縣晉以平陽已有永安故改此永安為永康又改曰武
康屬吳興郡隋屬餘杭郡大業末李子通置安州又曰
武州唐武德四年賊平因之七年州廢來屬梁屬杭州
皇朝太平興國四年復來屬有封嵎山餘不溪

上婺州春秋戰國皆屬越秦屬會稽郡二漢因之吳孫
皓分置東陽郡晉宋齊因之梁置金華郡陳因之隋平

陳郡廢置婺州以當天文婺女之分為名大業初州廢
復置東陽郡唐武德四年置婺州天寶元年曰東陽郡
石晉升武勝軍節度皇朝淳化元年改寶寧軍今縣七
望金華縣本漢烏傷縣地屬會稽郡初平三年分縣南
鄉置長山縣吳為東陽郡治晉以後因之或云本曰長
仙亦松子采藥此山因而居之故以為名後傳呼乖訛
字亦隨改梁置金華郡隋開皇中郡廢置婺州改長山
縣為吳寧十二年改曰東陽十八年又改曰金華大業

初復置東陽郡唐復曰婺州有金華山赤松澗

望東陽縣本漢烏傷縣地唐垂拱二年分義烏置屬婺州有峴山

望義烏縣本二漢烏傷縣屬會稽郡異苑曰東陽顏烏以淳孝著聞父死負土成城羣烏銜土助焉而口皆傷因以名縣自晉至隋皆屬東陽郡唐武德七年改烏傷為義烏有靈黃山

望蘭溪縣本金華縣地唐咸亨五年分縣西界置屬婺

州有九峯山

緊永康縣吳赤烏中分烏傷縣上浦置晉至隋皆屬東陽郡唐武德四年置麗州八年州廢來屬有石城山上武義縣吳赤烏八年置後廢唐天授二年分永康復置屬婺州後改曰武城天祐中復曰武義有八素山

上浦江縣唐天寶十三載分義烏蘭溪及杭州富陽置浦陽縣屬婺州後改為浦江

輿地廣記卷二十二

欽定四庫全書

輿地廣記卷二十三

宋 歐陽忞 撰

兩浙路下

上明州秦屬會稽郡漢已降因之唐開元二十六年採訪使齊澣奏以越州之鄞縣置以境有四明山為名天寶元年曰餘姚郡梁升為望海軍節度皇朝建隆二年改奉國軍今縣六

望鄞縣本漢鄞縣屬會稽郡東漢晉宋皆因之隋平陳省入句章屬會稽郡唐武德四年以句章縣置鄞州八年州廢更置鄞縣屬越州開元中置羽州軍宋時改曰鄞縣有四明山鄞縣故城在今縣東南漢屬會稽郡東漢及晉宋皆因之隋平陳省入句章句章郡漢

闕

晉宋隋皆因之唐省入鄞縣故城在今縣西

望奉化縣本漢鄞縣地唐開元二十四年分鄞縣置屬明州有鎮亭山

上慈溪縣本漢句章縣地唐開元二十六年分鄞縣置
屬明州有句餘州

上定海縣本望海縣朱梁開平三年吳越錢鏐奏置屬
明州後改曰定海縣有浹江越滅吳欲遷吳王夫差於
甬東韋昭以為句章東口外洲是也

下象山縣本漢鄞縣地唐神龍二年分寧海鄞二縣置
屬台州廣德二年來屬有東門山即漢志所謂越天門
山也

下昌國縣皇朝熙寧六年析鄞縣置有雲霄山

望常州春秋屬吳戰國屬越後屬楚秦漢屬會稽郡東漢屬吳郡吳分會稽之無錫以西為屯田置典農校尉晉太康二年省校尉屬毗陵郡惠帝以東海王越世子名毗改曰晉陵郡宋齊梁陳因之隋平陳郡廢置常州大業初州廢置毗陵郡唐武德三年復置常州天寶元年曰晉陵郡後復曰毗陵皇朝因之今縣五

望晉陵縣本延陵吳季札居之漢曰毗陵縣屬會稽郡

東漢屬吳郡晉屬毗陵郡後郡縣俱改為晉陵隋初曰常州
後曰毗陵郡唐因之有橫山有季札墓在縣北七十里
漳浦之西

望武進縣本漢曲阿縣地晉分丹徒曲阿置屬毗陵郡
梁改曰蘭溪屬南蘭陵郡隋省入曲阿屬江都郡唐垂
拱二年復置於州城內與晉陵分治

望無錫縣吳太伯始所居地春秋屬吳戰國屬楚春申君城
故吳墟以自為都邑漢為無錫縣屬會稽郡東漢屬吳

郡吳省晉太康元年復置屬毗陵郡宋以後屬

闕

隋屬毗陵郡唐屬常州有慧山

望宜興縣本陽羨縣漢屬會稽郡

闕

郡吳屬吳

興郡晉惠帝以周玘創義討石冰分陽羨為義興郡以表其功宋齊梁陳因之隋平陳郡廢改陽羨郡為義興屬常州唐武德七年置南興州八年州廢來屬皇朝太平興國元年改曰宜興

望江陰縣梁分蘭陵縣置及置江陰郡隋平陳郡廢屬

常州唐武德三年置暨州九年州廢來屬南唐置江陰
軍皇朝淳化元年軍廢來屬三年復置軍熙寧四年又
廢來屬

上温州春秋屬越秦二漢屬會稽郡吳屬臨海郡晉明
帝置永嘉郡宋齊梁陳因之隋平陳郡廢屬處州大業
初屬永嘉郡唐武德五年置東嘉州貞觀元年州廢屬
括州上元二年置温州天寶元年曰永嘉郡石晉升靜
海軍節度皇朝太平興國二年降軍事今縣四

緊永嘉縣本東甌國漢惠帝立閩君搖為東海王都東甌世號曰東甌王後世為閩越所攻東甌舉國徙江淮之間東漢永和三年以章安縣之東甌鄉置永寧縣屬會稽郡吳屬臨海郡晉宋為永嘉郡治隋平陳郡廢改縣為永嘉唐為温州

望平陽縣本橫陽縣晉太康四年置曰始陽後改名宋因之後省唐武德五年分安同縣復置屬東嘉州貞觀元年省大足元年復置屬温州朱梁改曰平陽有橫陽

山

緊瑞安縣本東漢章安縣地吳置羅陽縣又改曰安陽
晉改為安國屬臨海郡宋因之隋省焉唐武德五年析
永嘉縣復置屬東嘉州貞觀元年屬括州上元二年屬
温州五代時改曰瑞安

上樂清縣本樂城縣晉孝武分永寧縣置屬永嘉郡宋
因之後省入永嘉縣唐武德五年復置屬東嘉州七年
又省載初元年復置屬温州五代時改曰樂清有鴈蕩

山芙蓉山

上台州春秋戰國屬越秦屬會稽郡漢屬東甌國後屬
會稽郡東漢因之吳置臨海郡晉宋齊梁陳因之隋平
陳郡廢屬處州後屬永嘉郡唐武德四年置海州五年
改為台州天寶元年曰臨海郡皇朝因之今縣五

望臨海縣本漢回浦屬會稽郡東漢改曰章安吳分章
安置臨海縣屬臨海郡晉宋因之後省入章安隋平陳
郡廢改章安曰臨海屬處州後屬永嘉郡唐武德四年

置海州五年改為台州天寶元年曰臨海郡皇朝因之
今縣五

望臨海縣本漢回浦屬會稽郡東漢改曰章安吳分章
安置臨海縣屬臨海郡晉宋因之後省入章安隋平陳
郡廢改章安曰臨海屬處州後屬永嘉郡唐武德四年
置章安縣五年改曰台州八年省章安有括蒼山天姥
山

望黃巖縣本永寧縣唐上元二年分臨海置屬台州天

授元年更名有黃巖山

緊寧海縣本漢剡縣地晉為寧海縣屬臨海郡宋因之
後省唐武德四年析臨海復置屬海州七年省入章安
永昌元年復置屬台州有桐柏山

上天台縣吳置始平縣晉太康元年改曰始豐屬臨海
郡宋因之後省唐武德四年析臨海縣復置屬海州八
年省貞觀八年復置上元二年改為唐興朱梁改為天
台後唐復故石晉改為台興皇朝建隆元年復改曰天

台有天台山赤城山

上僊居縣本樂安縣晉永和三年分始豐縣南鄉置宋
因之後省唐武德四年析臨海置屬海州八年省上元
二年復置屬台州五代時改為永安皇朝景德四年改
為僊居

上處州春秋戰國屬越秦屬會稽郡漢為東甌國地後
屬會稽郡東漢因之吳置臨海郡晉屬永嘉郡宋以後
因之隋開皇九年平陳置處州十二年改為括州大業

初州廢置永嘉郡唐武德四年復置括州天寶元年改
曰縉雲郡大歷四年避德宗名改為處州皇朝因之今

縣五

望麗水縣本漢章安縣地隋平陳分松陽縣東更置括
蒼縣及處州又改曰括州州廢永嘉郡唐曰括州大歷
十四年改曰處州縣曰麗水有括蒼山

望龍泉縣本遂昌松陽二縣地唐乾元二年析置龍泉
縣有豫章山龍泉湖

上松陽縣吳置屬臨海郡晉因之宋屬永嘉郡隋平陳
郡廢屬處州唐因之朱梁時楊氏據江淮於是吳越錢
氏上言以海寇未平恥聞逆姓請改為長松後又改曰
白龍皇朝咸平二年復曰松陽

上遂昌縣本漢太末縣地吳赤烏二年置平昌縣晉太
康元年改為遂昌屬東陽郡宋因之後省而復置唐武
德八年又省入松陽景雲二年復置屬括州

上縉雲縣本括蒼縣地唐萬歲登封元年置屬括州有

縉雲山有好溪本名惡溪多水怪唐大中中刺史段成
或有善政怪族自去因改曰好溪

中青田縣本括蒼縣地唐景雲二年置屬括州有石門
山宋謝靈運所遊有題詩有青田溪永嘉記曰青田有
雙白鶴年年生子長便去

上衢州自隋以前地理與婺州同唐武德四年平李子
通析婺州之信安置衢州以州西三衢山為名七年陷
輔公祐乃廢垂拱二年復置天寶元年曰信安郡皇朝

因之今縣五

望西安縣本漢太末縣地東漢初平三年析置新安縣
屬會稽郡晉太康元年改曰信安屬東陽郡宋至隋皆
因之唐置衢州咸通中改曰西安故定陽縣漢末孫權
分新安置晉屬東陽郡宋因之後省唐武德四年析信
安復置六年省之故盈川縣唐如意元年析龍丘置元
和七年省入信安有石室山晉民王質伐木至石室山
見童子四人彈琴而歌質倚斧柯聽之俄頃而去斧柯

爛盡既歸已數十年親戚凋落無復向時矣

緊江山縣本須江縣唐武德四年析信安置屬衢州八年省永昌元年復置五代時改為江山有江郎山通典謂之須郎山發地如笋有三峯焉

上龍遊縣本姑蔑越之西部也秦為太末縣屬會稽郡二漢因之晉宋以後屬東陽郡隋平陳省入金華唐武德四年復置太末縣及穀州八年州廢省縣入信安貞觀八年復置更名龍丘屬婺州五代時改為龍遊有龍

丘山穀水

中常山縣本信安縣地唐咸亨五年置常山縣屬婺州
垂拱二年來屬乾元元年屬信州後復故有常山

中開化縣本常山縣地皇朝乾德四年置開化場太平
興國六年升為縣

上睦州春秋戰國屬越後屬楚秦屬會稽鄣二郡漢屬
會稽丹陽二郡東漢屬丹陽吳二郡梁置新安郡隋平
陳郡廢仁壽二年置睦州大業初州廢置遂安郡唐武

德四年改為睦州天寶元年曰新定郡皇朝因之今縣

六

望建德縣本漢富陽縣地屬會稽郡吳置建德縣屬吳郡晉宋因之隋省入吳寧唐武德四年復置屬睦州七年省入桐廬雉山永淳二年復置萬歲通天二年州自雉山移治於此

望青溪縣漢歙縣地屬丹陽郡梁置新安郡及新安縣隋平陳郡廢大業初改為雉山縣置遂安郡唐武德四

年置睦州文明元年復為新安萬歲通天二年州徙治建德開元二十年改為還淳永貞元年改曰青溪有雉山

上桐廬縣漢富春縣地吳分置屬吳郡晉宋因之隋平陳縣廢仁壽中復置屬睦州唐武德四年置嚴州七年州廢來屬有嚴陵山嚴陵瀨即嚴子陵之所居也

中分水縣本桐廬縣地唐武德四年置屬嚴州七年省如意元年復置更名武盛屬睦州神龍元年復故名

中遂安縣本漢歙縣地吳分置新定縣屬新安郡晉太
康元年改名遂安宋因之隋平陳縣廢仁壽中復置屬
睦州唐因之有白英山

中壽昌縣本雉山縣地唐永昌元年分置屬睦州載初
元年省神龍元年復置

上秀州春秋時吳越分境於此吳亡屬越越敗屬楚秦
屬會稽郡漢因之東漢晉宋屬吳郡隋唐屬蘇州後屬
杭州石晉省吳越錢氏奏置秀州皇朝因之今縣四

望嘉興縣故槁李地吳之南境春秋吳伐越越子陳于槁李即此秦為長水縣望氣者云有天子氣始皇乃令囚徒十萬人掘汙其地表以惡名改曰囚拳縣後曰由拳漢屬會稽郡東漢屬吳郡吳黃龍四年由拳有嘉禾生改為禾興後太子諱禾改為嘉興晉宋因之後省焉唐武德七年復置屬蘇州八年省入吳縣貞觀八年復置五代屬杭州吳越王錢元瓘奏置秀州有胥山

紫華亭縣本崑山縣地唐天寶中置屬蘇州後屬秀州

有華亭谷水有崑山吳陸氏之先葬此後機雲兄弟有辭學時人以玉出崑岡因名之有機雲宅在谷中後機臨刑歎曰華亭鶴唳可得聞乎

上海鹽縣故武原鄉越地也秦置海鹽縣屬會稽郡漢因之東漢屬吳郡順帝時縣淪陷為湖今當湖是也大旱湖竭城郭猶可識後乃移治今所晉宋因之後省焉唐景雲二年分嘉興復置屬蘇州先天元年省開元五年復置後屬秀州

中崇德縣有語兒水本曰禦兒越之北境越語云勾踐
之地北至禦兒即此

欽定四庫全書

卷二十三

輿地廣記卷二十三